


BIBLIOTEKA

Zakł. Nar. im. Ossolińskich

XVII


4.252



Rep. Oss. 225

Tom ariwii x Acciawewhigo 1845

teka 14



RELATIO

Gloriosissimæ expeditionis, victo-
riosissimi progressus, & faustissimæ pa-
cificationis cum hostibus

24

Serenissimi & Po-

tentissimi Principis
ac Domini,


26

Dni. JOANNIS

CASIMIRI,

REGIS POLONIÆ

& SVECIÆ, &c. &c.



ANNO M. DC. XLIX.



XVII - 4252 - II



Qua occasione anno
 præterito Millesimo Sex-
 centesimo Quadragesimo
 Octavo Cosaci Zaporovi-
 enses, uno nefario authore
 conciti, inito foedere cum
 Tartaris Budziacēsisbus eo-
 rumque Duce Tohaibeo, & deinceps cum Cha-
 mo Crimensi arma contra Reipublicæ exerci-
 tum, ejusq; Duces sumpserint, quanta nostra cla-
 de ad Corfunum pugnatum, quam ingentem
 deinde Exercitum infinita rustica plebs, conti-
 nuo armorum contra Tartaros usu, bello affue-
 ta, atque exemplo Cosacorum tumultuantium
 ad rebellionem concita effecerit, quid Exercitus
 noster Panico quodam terrore à Pilaviecijs
 dissipatus, deinde à Leopoli repulsus Reipubli-
 cæ consternationis atq; mœroris iniecerit, quid
 ipsi Varſaviæ, atq; toti Electionis Novi Regis

conventui trepidationis intulerit, admoto hostili exercitu Zamoscio, illudq; obsidente minime opus est ad præsens recēdere. Ita q; illud memora-
verim, quod vel ipsa fama, quasi jam electi Regis
JOANNIS CASIMIRI tātum potuerit, quod
tam ingentes hostiles exercitus relicto Zamo-
scio ad suas sedes remigrare coēperit, atq; Rem-
publicam ab interitu (si hostis Vistulam transire
voluisset) liberaverit. Nimum hæc omnia, quia
anno præterito Orbi Christiano nota sunt, nova
narratione non egent, & rapit in sui admiratio-
nem animum, cum singularis & extraordinaria
Dei providentia, quā hoc anno res Polonicas
fovit, tum ingens animus & Spiritus Regis **JO-**
ANNIS CASIMIRI, quo rebus tam dubijs,
& summis Regni periculis commissorum sibi
à DEO populorum & Dominiorum defensio-
nem suscepit. Utrumq; enim hoc tacere pecca-
re esset in Deum impietate, & in unctum ejus
ingratitude. Optimæ spei, in quam nos erexit
tam faustum initium Regni **JOANNIS CA-**
SIMIRI, successerunt Comitia felices ejus Co-
rona-

ronationis, in quibus cum orarent Ordines, ut si commissio Pacificatoria ex voto non succederet, ipse Rex in hostem ire vellet, Regiamq; Majestatem opponeret, quamvis intelligebat, nō satis ab Ordinibus provisum esse securitati Reipublicæ, neq; ea decreta subsidia, quæ tam ingenti bello agendo sufficerent, magno tamen & imperterritō animo hanc in se provinciam suscepit, omnem suam auctoritatem etiam apud externos, ad hoc unum conferendo. Bellum itaq; ab hinc præparare non destitit, præfectis interim exercitui tribus Ducibus pari potestate, qui imperata Regis exequerentur, quæcunq; illis per intervalla Georgius Comes à Teczyn Ossolinski Sacri Romani Imperij Princeps, Supremus Regni Cancellarius, per citissimos nuncios deferret. Ita consumptum reliquum hyemis, & magna pars veris. Cum interim jam constaret Regi, quid in causa fuerit irritæ commissionis Pereaflaviensis, & unde imponebatur necessitas Ducibus Regij exercitus, cum rustica plebe, circa Barum cruento, sed tamen felici

Marte decernendi, nempe patuit jam consilium hostis, tradendi Regni Transylvano, inita cum eo armorum societate, inquam ut & Moscum pollicitatione magna parte Provinciarum Rusicarum pertraheret, plurimum idem hostis laborabat, sed in hoc potissimum omnes ingenij sui nervos intenderat, ut omnes, quotquot sunt, potentissimas Tartarorum Ordas in subsidium sibi contranosadscisceret. In hoc conatu dum hostis tempus insumit, usus eâ morâ prudentissimo consilio Rex, missisque legationibus formidabilem illam cum Transylvano & Moscho armorum conjunctionem avertit, & appropinquante Festo Pentecostes, quod Regij Comissarij Terminum armistitij fecerant, Ducibus Exercitus sui imperat, ut coadunato exercitu hostem aggrediantur, neq; tempus rei agenda omittant, priusquam hosti subsidia Tartarica advenirent. Exequuntur Regia imperata Duces, hostem multis in locis ad interneccionem cadunt, præsidia ejus arcibus, Civitatibus deturbant, easq; in potestatem Regis redigunt: quo tumultu ex-

tu excitus Chmielnicius, cū trecentorum
millium exercitu, ingentibus præterea Tarta-
rorum fultus auxilijs adest. Contraxerant jam
Regij Duces, circa Constantinovum rem con-
tra hostem agentes, omnes ferè eas vires, quæ-
cunq; ex Decreto Comitiali haberi poterant,
verum cum eas hostili potentia impares cerne-
rent, secedendum sibi ad Zbarascensem arcem
putârunt, loco commodo, uti ab eventu patuit,
sitam, ibique castris locatis, eandem vallo, & fos-
sâ muniunt, fixum in animo habentes, duram
potius & arctam, dum nova venirent subsidia,
ferre obsidionem, aut fortiter pugnando occum-
bere, quam turpi fugâ sibi consulere. Interim
Rex cōvocato Varsaviam Senatu, animi sui pro-
positum in hostem die Sancto Joanni Baptistæ
sacrâ eundi ei aperit, faustisq; omnium exceptis
acclamationibus edicit. Die verò supradicta, ad-
veniente benedictione à Nuncio Sedis Aposto-
licæ acceptâ ense & vexillo sibi ex altari tradito,
movit Lublinum versus, quod intra decimam
à profectione Varsaviensi diem, solemni milita-
ripom-

45 ri pompa à Nobilitate & multitudine exceptus, ingressus est. > Ibi aliquantisper, dum novæ legiones convenirent, moratus, fit certior de de obsesso ad Zbarasium exercitu, quare omni abjectâ morâ, quamvis parvo adhuc exercitu, neque comparentibus speratis subsidij, intrepido animo, summâ in auxilio DEI, quantamente hauserat, fiducia, Lublino decimâ septimâ Julij proficiscitur, & in ipso discessu superscriptum Regni Cancellarium, exercitus se comitantis Locum-tenentem Generalem constituit.

Sequenti die Crasnostavum ventum, & omnibus viribus in unum collectis, magnis quotidie itineribus, Rex castra promovebat, excipiendo per intervalla hinc & inde advenientes succursus. Illud unicum Regem anxium faciebat, quod missi in omnes partes varij exploratores nihil certi de hoste afferebant, nec ii, qui magno precio, spreto salutis periculo, penetrandi ad castra obsessorum emptam operam locabant, revertebantur, nihil omnino ab exercitu obsesso adlabente notitiæ. Venit tandem Vigesima

tertiâ die à profectiōe Lublinensi ad Castra Re-
 gia, ad Toporovum sita, vnus strenuus miles, li-
 terasq; attulit ab obsessi exercitûs Ducibus, stri-
 ctam obsidionem, famem, & aliarum rerû belli-
 carum inopiam significâtibus, Regiamq; Maje-
 statem, ut opem festinaret, obtestâtibus. Tum ve-
 ro jam quam celerrime, & quam proximis itine-
 ribus, in subsidium deplorati propè exercitûs, pro-
 perare visum, eâ tamē electâ viâ, quâ adueniētes à
 Leopolicohortes Regem assequi, & commeatus
 ab eadē Civitate, reficiendo militi, præsertim pe-
 diti, posset suppeditari. Promota itaq; castra ver-
 sus Oppidum Bialocamenū, vbi ob injurias cœli
 quatrimum consumptum, non sine ingenti Re-
 gis solitudine, quod de hoste nihil sciebatur.
 Quamvis enim non deerant, qui spreto salutis
 periculo, ex castris Regiis excurrendo, interci-
 perent captivos, sed quia ex illis nec de potentiâ
 hostili, nec de consilio quidquam perfecti intel-
 ligi potuit, in eadem de hoste ignorantia, ut an-
 te, versabamur. Eâ enim iste rebellis Cosaco-
 rum Dux vsus est arte, quod excitis in auxilium
 B suum

suum ingentibus, neque antea visis Tartaricis copiis, quibus una cum Cosacorum Legionibus conjunctis, Regium exercitum obsederat, ita in officio continuit suum exercitum, ut nullam inde excursionem, tanquam ipse obsidione cingetur, permetteret, sed quicquid Barbari ad usum poscebant, in castra eorum inferri faceret. Progredienti decima tertia Augusti cum exercitu à Zloczewo Regi occurrunt cohortes Palatini Cracoviensis, captivumque Tartarum adducunt, à quo illud tantum exploratum, adesse Chanum Crimensem in exercitu Cosacorum, cæterum quod hosti consilium fuerit, quis exercitus nostri ad Zbaraszium status, nihil certi ab eo intellectum. Progrediebatur nihilominus eo die exercitus, conspicua sanè acie, quam Rex ipse alijs etiam diebus, admirantibus vetustissimis militum, solebat instruere, ut in ipso itinere assuesceret miles servare ordines, tenere gradum, ferendique alijs subsidij modum edisceret.

Hoc ordine cum eâ die incessisset Exercitus, Rex inclinante & vesperscente die, medio

dio à Zborovo milliari , sex circiter leucis ab
 hoste distant loco , castra locat : Crastinâ die
 ulterius progressurus , nisi prohibuisset palu-
 dosa & limosa apud Zborovvozvia, ob adiacen-
 tia utrinque stagna & suo pte ingenio maden-
 tem terram, ideoq; transitu difficilis. Quam-
 obrem per sequentem diem decimam quartam
 Augusti ibidem subsistere visum , dum iter in-
 stauraretur traducendo commodius exercitui.
 Interea Rex crastinum Festum Assumptionis
 in coelos Deiparæ , solitâ pietate præveniens ,
 sacram synaxim sumpsit , magno totius Exer-
 citûs spectantis ad pietatem sensu. Hoc cultu
 persoluto superis, Rex ad solitâ belli munia re-
 gressus, quid in itinere , quid in prælio , si ad il-
 lud ventum foret, agendum esset, cum Cancel-
 lario & alijs Senatoribus contulit , & ea quæ
 constituerat , Tribunis militum , Centurioni-
 bus, & quorumcunque illa scire interfuit, edici
 mandavit. Inclinate jam die , incertum quo
 authore, currebat per castra rumor, hostem in
 vicinia aliquot locis visum, sensim castris ad re-

repentem , quamobrem mandato Regis Cancellarius Marcum Gdesynium militem , & Centurionem veteranum , imprimis verò peritiâ explorandi de hoste ante omnes celebrem , hocque nomine ab anterioribus Ducibus commendatum laudatumque , additis illi aliquot levioris armaturæ cohortibus , & Centurionibus hâc in re peritis , ire jubet causa explorandi de hoste , monetq; ne sine insigni aliquo captivo ad Regem regrederetur. Reverfus vesperascente die Gdesynius , retulit Regi se ad trium milliarium spatium , omnia loca circumcirca perlustrasse , sed nè vestigium quidem hostis reperisse : itaq; jussu Regis monet Cancellarius Castrorum excubitores , ut crastinâ luce quam maturrimè versus Jeziornam proficiscerentur , viderentq; num aliquis motus sit ab hoste , secundum hos iret primâ vigiliâ , ducente eam Carolo Duce Corecensi , illū deniq; sequeretur ipse exercitus , cum tormentis & apparatu bellico , superato difficili & limoso tramite , de quo supra diximus , præstolaturus ,
dum

duim currus & impedimenta omnia limosam eandem viam superarent. Insuper dat negotium cohortibus Palatini Cracoviensis, ut in loco castrorum suorum tantisper manerent, donec currus omnes & impedimenta transfirent.

Venit dies decimaquinta Augusti, dies inquam sacra triumphanti Cœlorum Reginae, imo & Poloniae, quo titulo eam totum hoc Regnum supplex veneratur, perficiuntur omnia imperata Regis, abeunt summâ luce castrorum excubitores, eos sequitur cum primâ vigiliâ Dux Corecius: superanti limosam viam exercitui, ipsemet Rex inde fatigatus assistit, impedimenta & apparatus bellicus, paludosum tramitem transeunt. Interim Castrorum excubitores usq; Jeziornam, vnâ & mediâ leucâ à Castris distantem, progressi, visis à longè aliquot antecursoribus Tartaricis, nunciant Regi adesse hostem, ut ipsi rebantur, non cum toto exercitu, sed validâ ejus parte venientem: quod postquam intellexit Rex, advocatis iis, quos laboris socios sibi adsciverat, instruere incipit illam

partem exercitus, qui paludosum illum trami-
tem superaverat. Sed vaferrimus & velocissi-
mus hostis, non armis, non sarcinis, aut ullis
impedimentis onustus, semperq; celeritate bel-
lare solitus, tum quoque eâ usus, non multum
temporis struendæ aciei concessit, nam quin-
milliaribus, à loco ubi Regium obsidebat exer-
citus, hâc nocte confectis, cum Centum milli-
bus Tartarorum, & quinquaginta millibus se-
lectissimi equitatus Cosacorum, Regi occurrit,
subsequentibus Centum quinquaginta millibus
Cosacorum, qui vesperscente eâ die advene-
rant. Postquam itaque propius accessit hostis,
quinquaginta millia suorum in alteram partem
paludosæ viæ, ad circumvenienda terga nostra
destinat: Centum verò millia à fronte Regis
locat, ut utrinque exercitum nostrum preme-
ret. Antequam in conspectum Regij exer-
citus venisset hostis, à tergo, nimirum ex alterâ
parte limosæ illius viæ, supra quam currus
nostri, arctissimo agmine transitum præsto-
lantes, constiterant, oritur tumultus, & disso-
ni cla-

ni clamores, quibus permota pars illa exercitus, quæ nondum transierat, vertit se in hostem cum suis Centurionibus, & Tribunis Militum ibi nescitur quo errore (nam variis hoc imputatur) cohortes nostræ longè à curribus & Oppido jam milite firmato abductæ, deserto insuper peditatu, ad arcendum transitu hostem, supra limosum tramitem relicto, quem protegere debuerāt, præbuerunt occasionem, & delendo illi peditatui, & suæ Cladi, quam acceperunt. Pericere enim tunc Balduinus Comes de Teczyn Ossolinski, Magni Cancellarij ex Fratre Nepos, Felix Tyskievicus Palatini Brestensis Filius, Joannes Rzeczycki Capitaneus Vrsedoviensis, præter alios viros insigniores, minor tamen fuit quam pro tumultu cædes, nam computatis etiam vi-
 lioribus capitibus non amplius ex nostris, in eâ parte paludosi tramitis, quam mille desiderati, reliqui, quibus fortuna belli tunc pepercit, inter currus se recipiendo, obversi in hostem eum fortiter repulerunt, & postmodum superato difficili illo tramite, Regi se, & reliquo exercitui
 asse-

associârunt. Dum ita res in illa parte agitur ,
 veniunt in conspectum Regis divisi bifariam e-
 exercitus hostiles cōstituentes Centum millia ho-
 stium. In primis conserit cum hoste manus pri-
 ma vigilia quam ducebat Dux Corecensis. Diu
 Vir fortissimus sustinuit hostem, tandem obru-
 tus multitudine, sensim & pugnando versus e-
 exercitum nostrum se recipit , hoste etiam sub-
 sequente.

Ibi verò in primis patuit gloriosa, expediti
 in omnia pericula, animi Magni Regis Nostri
 fortitudo , cum inusitato non tantum Monar-
 chis & Regibus , sed etiam Ordinarijs exerci-
 tum Ducibus exemplo, ante primam aciem in
 patenti campo, solo stricto gladio armatus, ubiq;
 occurrebat, ubiq; aderat , suos animando , hâc
 immortalī gloriâ dignâ voce ad milites vsus:
 Vobiscum vivere, mori q; volo. His non con-
 tentus, nutantibus primæ vigiliæ vexillis , sub-
 mittens in subsidium novas cohortes , ipse met
 Rex in aciem eas produci , hostem q; ad ce-
 dendum cogit. Verum cum neq; hæc submissa
 à Rege

à Rege subsidia, affluentem innumeræ hostium multitudini resistere possent, Cancellarius à Rege iussus in lævam advolat, hisquæ laborantibus submittit subsidia, hisquæ cedentibus, ipse se cum reliquis cohortibus opponit, non densâ sagittarum procellâ, non ingenti Tartarorum cuneo sibi potissimum, ut erat formâ corporis & habitu cõspicius, imminenti, perterritus. Constitit in secundo agmine auxiliares cohortes, quas contra hostem Rex succedere jubet, illæquæ impigrè irruentes, sustinuerunt impetum hostis; converso deinde in subeuntes per occultas valles Cosacos, qui forte aderat in lævo cornu peditatu, sensim deferbuit furor hostilis, deincepsquæ solas velitationes exercendo, & tentato, irritò conatu, dextro cornu, quod Potocius Palatinus Podoliæ curabat, lævum verò Georgius Lubomirscius Capitaneus Cracoviensis, aliquot horis ante occasum solis turpiter hostes campo cesserunt, & in sua castra se recipiendo, advenientibus centum quinquaginta millibus Cosacorum, de quibus supradiximus, sensim ab

omni parte, & è longinquo exercitum, & castra Regia circumdando, formam obsidionis ostentabant.

Ita dies is, qui Poloniæ extremus videbatur, illâquè cadente toti Christianitati fatalis, inauditâ & incomprehensibili providentiâ Dei, & gloriosissimâ fortitudine imperterriti Principis exactus est; desideratis in hâc parte quinque aut sex militibus, viginti verò aut ad summum triginta vulneratis. Depulso hoste Rex cum Senatu præsentè, castrensi more, in equis deliberat, quid factò opus sit, spectatâ tantâ multitudine hostium, trecenta millia superantium, præter alium hostilem, exercitum, qui Regium exercitum jam semisepultum obsidebat. Versabatur ante oculos periculum, ne & iste exercitus simul cum Rege obsidione clauderetur, circumfusus jam nobis vndiq; hostium copiis; Ad ferendam vero obsidionem nec locus munitus, nec abundantia Victualium, nec spes alicujus auxilij aderat, clauso obsidione Rege, & in vtrisque castris primariis Præfectorum. His in-

ter se agitatis, variæ erant sententiæ, ferè tamen ab omnibus in eam sententiam itum, aut Principem clandestinè abducendum esse, aut Chanum Crimensem blandiori Epistolâ demulcendum, atq; à societate Cosacorum variis pollicitationibus abstrahendum.

Cancellarius verò cum neq; clandestinum modum abducendi Principis, neq; ferendi subsidij vllam viam rationemq; inveniri posse asseruisset, omnem spem salutis à providentiâ DEI, & à fortitudine optimorum bello virorum petendam esse duxit, hoc est, conglobato exercitu quærere oportere salutem per medios hostes, cætera Deo committenda. Interim non abs re putavit, compellare Chanum literis, non ejusmodi tamen tenoris, quæ indignitatem aliquam, quasi jam victi Principis, præferrent. Itaque postquam Rex fugam detestatus & abominatus, hanc ultimam secutus est sententiam, demandavit supremo Cancellario, vt eas literas ad Chanum mitteret, quas ipse Regentem Cancellariæ suæ, sine morâ, infra scripti tenoris, exarare iussit.

JOANNES CASIMIRVS DEI gratiâ Rex Poloniae, Magnus Dux Lituaniae, Russiae, Prussiae, Masoviae, Samogitiae, Livoniae, Kioviae, Volhyniae, Sino-
lensciae, Cernichoviaeq, nec non Suecorum, Gothorum,
Vandalorumq, hereditarius Rex, Magnarum Ordarum
libero Chano Islan Giercio, Cerkassienfi, N. hacensi, Pe-
tioresi, Szemensi, Perecopensi, Crimensi, Amico & Fratri
Nostro salutem. Cum sciamus te memorem esse beneficio-
rum à Fratre Nostro, Serenissimo & Potentissimo Domi-
no, Domino VLADISLAO IV. olim Poloniae Rege, (cœlesti
jam Regno fruente) acceptorum, qui te benignè tractavit,
incolumem servavit, libertate donavit, quam nactus hoc im-
perium, quod nunc tenes, adeptus es, miramur, quod cum
memor sis tantæ Serenissimi & Potentissimi Vladislai IV.
Fratri Nostri erga te beneficentiae, cum nos venimus ad se-
dandos motus imperij nostri, associasti te huic rebelli no-
stro, & contra exercitum nostrum arma sumpsisisti, licet nul-
lo tuo solatio & fructu, speramus enim quod neq, postmo-
dum DEVS conatus tuos prosperabit: Nihilominus polli-
ceri tibi amicitiam Nostram, & revocare tibi in memoriam
beneficia Fratris Nostri, nunc amicitiam Nostram tibi offe-
rimus, & utrinq, illam florere cupimus. Datum in Castris
ad Zboro wo die decimâ quintâ Augusti, Anno à Nativitate
Domini Nostri JESU Christi, Millesimo Sexcentesimo Qua-
dragesimo Nono, Regnorum Nostrorum Poloniae I. Sue-
ciae II. Anno.

Ad Mandatum Sac. Reg. Ma-
jestat. Proprium.

HIs cum literis eâdem nocte, misso captivo Tartarico ad castra Chani Crimenfis Rex, comitantibus eum Cancellario, aliisque Proceribus, tota castra circumcirca obequibat. Interim jussu Regio, lucente Lunâ, tumultuario opere, fossia & vallum præ castris excitabatur, ea loca, ubi operæ sufficere non poterant, curribus opplebantur, Rege totum exercitum ad vigiliam integræ illius noctis adhortante, & alia, quæ usus belli poscit, præscribente. Nocte deinde intempestâ, nunciatur Regi, sparsum ab aliquibus meticulosis in remotiore castrorum parte rumorem, quasi Rex mediâ nocte discessum è castris pararet, tum Rex gnarus, quid ex illâ falsâ famâ perturbationis in exercitu nasci posset, illicò conscenso equo, tota castra prælucentibus funalibus obibat, suam omnibus testatam faciens præsentiam, idq; ipsum iteratâ vice præstitit, quò invictæ suæ constantiæ exemplo revocaret à consilio turpi fugæ eos, qui illam molirentur.

Postera diei summâ luce ab alterâ parte li-

mosæ illius viæ, novus exoritur tumultus, cum
 Oppidum Zborovvo, aliquot cohortibus pedi-
 tum præsidio, à Rege firmatum, quinquaginta
 millia Cosacorum oppugnarent, & impedin-
 torum nostrorum majorem partem in eâ parte
 hærentium, innumerabilis Tartarorum multi-
 tudo diripere conaretur. Sed utrobiquè irritus
 conatus hostium fuit, nam & Cosaci ab Oppido
 repulsi, & calorum lixarumq; nostrorum multi-
 tudo ductu optimorum militum, & aliquorum
 religiosorum, adeò fortiter restitit Barbaris, vt
 non tantum eos à curribus nostris longè arcue-
 rit, sed etiam ad multa stadia eosdem persequen-
 do, ingentem in illis stragem ediderit. Non dissi-
 mili successu Oppidum Zborovvo propugna-
 tum, nam adscita pars calorum & lixarum in-
 ter peditatum nostrum Oppidum propugnân-
 tem, factâ inde eruptione, ingenti distantiâ loci
 Cosacos persequendo adeò cædebat, vt eorum
 cadaveribus campi longè lateque opplerentur.
 Interim hostis, conjunctis jam viribus, diviso tri-
 fariam exercitu (nam quartam partem Castro-
 rum

rum nostrorum Oppidum cum stagno supra-
 memorato tegebat) à fronte Castra Regia ag-
 greditur, atque inprimis levibus velitationibus
 distinēdo Regem lævâ, per occultas valles juxta
 littus stagni infra-jacentis, submittebat innu-
 meras legiones peditum, quæ occupato, immi-
 nenti castris nostris templo, Ruthemio, vallo
 illud, fossâque munire, indeque castris nostris
 propius accedere coeperunt, observatâ propu-
 gnaculi lævæ partis debilitate, quod nec satis
 benè munitum, nec sufficiente præsidio fir-
 matum. Quod conspiciatus Cancellarius, man-
 dante Rege, quamprimum operas usq; ad ripas
 stagni continuare, locumque illum milite fir-
 mare imperat. Verum operum continuatio-
 nem interrupt hostis, mox ex munitione tem-
 pli Ruthenici, de quo supra meminimus, tor-
 menta & machinas bellicas in nos collineans,
 iisque castra nostra quatiens; deinde cæco impe-
 tu per occultas valles, secundumque ripam sta-
 gni ad oppugnanda castra nostra, innumerabi-
 lem effundens multitudinem, quæ tanto irruit
 impetū,

impetu, ut vnus hostium ausus sit, insiliens val-
 lum nostrum, signum hostile ex illo proferre,
 sed mox globo trajectus temeritatis pœnas luit.
 Concursum interea illuc ab omni parte, tanto
 conatu fervoreq; militum nostrorum, vt hostis
 non tantum oppugnationem, & ipsam pugnam
 defereret, sed usquẽ ad templum illud Rutheni-
 cum à nostris fugatus, illam munitionem abdu-
 ctis raptim suis tormentis, nostris relinquere
 coactus fuerit. Idem accidit, omnibus alijs lo-
 cis, vbicunq; hostis excitare propugnacula co-
 nabatur. Duravit flagrantissima vbiq; pugna
 amplius quatuor horis, quâ, fatente postmo-
 dum ipsomet hoste, cæsum decem, lethaliter
 vulneratorum, & cum ad castra hostilia ad
 Zbaraszium sita, mitterentur, ex vulneribus
 mortuorum novem millia numerabantur. Ita
 cæsus hostis remisit plurimum ex impetu, moxq;
 tam tormentorum fulmine, quam sclopetari-
 orum strenuè eiaculantium virtute, equitumq;
 nostrorum ex castris excurrentium fortitudi-
 ne, campis omnibus pulsus, duabus horis ante
 meridiem

meridiem , turpiter in castra sua se recepit. Tentabatur quidem adhuc expugnatio Oppidi Zborovvo magno conatu , verum nullo effectu, submitte sapius illuc Rege novas recentesque militum cohortes.

Expertus jam Chanus Crimensis Regii animi, ejusque exercitus fortitudinem , ipso medio ejus diei misit responsum super literas Regias, nocte præteritâ ad se missas. Falsus in primis Regiæ Domus erga se beneficia, causas initæ cum Cosacis societatis, & irruptionis in ditiones Regis tribuebat taciturnitati Reipublicæ , quasi se aspernantis, neque eum & populos ejus in hominum numero reputantis. Et quamvis venisset huc animo hyemandi, tamē quò sibi comparare posset amicitiam, ac fraternitatem Regis, rogare ut Rex deputeret magnum suum Vesirium, hoc est, supremū Regni Cancellarium, qui cum suo Vesirio colloquium haberet fidum, & fraternū, sperans ex hoc mutuo colloquio fraternitatem, & amicitiam inter Regem & illum orituram. Huic Epistolæ adjunctæ fuerunt literæ Chmiel.

nicij ad Regem scriptæ, per occasionem literarum Regis, ante aliquot dies, ad castra Cosacorum missarum, quibus Rex Chmielnicium rebellem, & perfidum declarabat, abrogans illi imperium in exercitum Cosacorum datum; Cosacos verò monens, ne Chmielnicium amplius audirent, sed huic obedirent, quem Rex illis, literis suis publicis, præficiebat. In hac itaque Epistolâ Chmielnicius ad Regem scriptâ, magnâ cum submissione animi fidem suam, & obsequium erga Regem asserens, & quicquid malorum secutum fuerat, Regiis exercitibus, se persequentibus, tribuens, promptum se exequendis imperatis Regiis, resignandâq; potestatis in Cosacos sibi concessæ, ostendebat. Utrisq; his literis lectis, respondit Rex literis Chani Crimensis, deputaturum se Cancellarium, illiq; commissurû, ut loco aliquo, inter vtrâq; castra medio, cum Vesirio Chani colloqueretur. Inclinate jam sole versus occasum, nunciant Vigiles castrorû, Vesirium Crimensem in campo adesse Cancellarium præstolantem, tum Cancellarius post aliquam

quàm temporis moram, Vesirio ad colloquium,
 propè ipsa castra Regia, in locum à se delectum,
 evocato, tandem castris egressus, inter innume-
 rabiles hominum catervas, longè à loco congres-
 sùs consistentes, octo è suis comitibus assumptis,
 in vallem planam ad eum descendit. Ibi dictâ in
 primis mutuò salute, quid nomine Domini sui
 adferret Vesirius, rogat Cancellarius, quando-
 quidè Rex, Dominus ejus, rogatus à Chano Cri-
 mensi eâ de causâ illum misit, vt intelligeret, quid
 Vesirius nomine Domini sui posceret. Paucis
 respondet Vesirius, se à Domino suo missum
 esse cum testificatione benevolentis & amicitiae
 fraternae erga Regem, ad quam eum invitabant
 vetera beneficia Regiae Domus: hinc ad vlti-
 riores sermones inter Cancellarium, & Vesiri-
 um ventum, per quos Cancellarius id agebat,
 vt mentem Vesirij altiùs introspiceret, quidnam
 sub specie amicitiae Dominus ejus vellet. Post-
 quam verò intellexit nō ampliùs peti, quam sti-
 pendium militare, antiquitùs à Regibus Polo-
 niae Chanis Crimensibus dari solitum, & prae-
 te-

rea gratiam Regiam Cosacis, pollicitus Cancellarius totum, quod audiverat, Regi se relaturum, curaturumq; vt amicitia, & fraternitas inter hos Principes redintegretur, pacti invicem postera luce se redituros, captumq; colloquium continuaturos, amicè ad castra sua digrediuntur. Priusquã ex eo loco abirent, misit Vesirius tam ad Cosacos, Oppidum Zborovvo incessanter oppugnantes, qui, minis interpositis, eos monerent, ut illicò ab oppugnatione Oppidi desisterent, munitiones defererent, tormentisq; inde abductis, in castris suis se continerent, quam qui Tartaros circa castra Regia, cum nostris velitationes exercentes, campis vndiq; depellerent. Finita, per hæc, eâ die, successit nox quietissima, vigiliæ tamen castrorum non intermissâ diligentia peragebantur, ne hostis sub specie amicitiaë nocturnis insidijs nos appeteret. Ergo decima septima Augusti prodierunt iterum in campum Cancellarius, & Vesirius, inter ingētes ab vtrinq; effusas copias, inter quas amicaë salutationes & colloquia, tanquam perfectâ pace peragebantur,

non sine ingenti discrimine Cancellarij, quem sæpè innumerabili agmine circumvallabat hostis, prætextu congressûs, & colloqij, cum nostris hominibus, quod ille intrepido animo sustinuit, neq; ab incæpto opere passus est se revocari ab his, qui indemnitati ejus volebant consultum. Stetit itaq; pax, intra horas viginti quatuor, computando tempus ab illâ horâ quâ, tractari cœptum, constitutis pactis gloriosissimis, quorum hæc est essentia.

Ab hac horâ sit inter Regem JOANNEM CASIMIRVM, ejusq; Successores Reges Polonię, & IslanGiereium Imperatorem Tartarorum, ejusq; familiam Gierciam, amicitia, & fraternitas in perpetuum. Rex Poloniae, ex liberalitate & munificentia suâ, dabit Stipendium ordinarium Imperatori Tartarorum quotannis, quod ipse per Legatos suos petet, missos Camenecum in Podoliam. Imperator vicissim Tartarorum erit obstrictus, adesse Regi cum omnibus suis copiis, quandocunq; Rex jusserit, contra quemvis hostem Regis. Non amplius licitum erit vel vniequiti Tartarico, hostili animo ingredi viciniora Regis Poloniae, aut prædas agere, imò Imperator Tartarorum indemnes ab omni incursione Tartarica præstabit ditiones Regis Poloniae. A Castris Zbarazensibus obsessus confestim Tartaricas, quam Cosacorum copias absolvet, illumq; exercitum ad Castra

Sac. Reg. Majestatis vel quocunq; Rex jusserit, transeuntem minimè infestabit. Ex ditionibus Sac. Reg. Majestatis, sine ullâ morâ, omnes Tartaricos exercitus, & quicquid est Turcarum Vromeliensium educet, & ad illorum sedes relegabit. Rex autem Poloniae in gratiam Imperatoris Tartarorum, exercitum Cosacorum Zaporoviensium humiliter veniam rebellionis petentem, & scelus suum deprecantem, à crimine prædicto absolvet, & in gratiam Regiam recipiet.

Sic pace cum Imperatore Tartarorum stabilitâ, digrediuntur Cancellarius & Vesirius cum applausu & lætitiâ totius exercitûs, mandans Cancellarius Chmielnicio, qui Vesiriû comitatus eò advenerat, vt intra duas horas mitteret ex suis aliquos ad Regem, nomine totius exercitûs Zaporoviensis, petendæ veniæ causâ, quod ille mox executus est. Advenientes itaq; in Castra Regia, qui à Chmielnicio missi erant, ducebantur inter densa agmina militum in amplissimum tentorium ad Regem pro Majestate sedentem, in cujus conspectû postquam venerunt, procidentes in terram, crimen totius exercitus cum lachrymis confessi sunt, veniamq; & misericordiam orando, supplicem libellum nomine totius exercitûs Regi porrexere. Deinde nomine Regis respondit Cancellarius, Regem pro innatâ clementiâ nullius, tanto minùs Subditorum suorum cruoris sitientem, gravissimum crimen exercitui suo Zaporoviensi ignoscere, modò deinceps ille atrocissimum hoc delictum, fide, obsequio, virtute, corrigere, & supplere contendat,

dat, quod autem attineret supplicem libellum, Regem ea, quæ petuntur, expensurum concessurumq; quæ ex dignitate Majestatis suæ, & ex securitate salutis Reipublicæ concedi poterunt.


His peractis duo sequentes dies, exequendis rebus jam constitutis dati, videlicet dum Rex super petita Cosacorum voluntatem suam declararet, dum Chmielnicius fidem, & obsequium, nomine totius exercitus Regi, & Reipublicæ juraret, dum literæ Pactorum vltro citroquæ redderentur; dum inter ipsos Principes familiariores visitationes peragerentur, certantibus Principibus inter se donis, missis vltro citroquæ præstantibus equis.


Tertiâ tandem die abibant omnes Tartarici exercitus, versus Zbaraszium, eos sequebantur Cosacorum legiones, prius tamen veniente ipso Chmielnicio ad castra nostra, veneratum Regem, ad quem introductus in terram prostratus, veniam criminis flens petit, omnem in posterum fidem & obsequium Regi pollicitus.

Hâc ratione, intra breve temporis spatium, extinctum est formidabilis belli incendium, nō ad solius Regni Poloniæ ruinam, sed ad Christianitatis totius perniciem excitatum. Rex per biduum in eodem cōsistens loco, non prius promovit castra, quam intellexit, omnes Tartaricas & Cosacorum legiones ad Zbaraszium pervenisse. Lento ergo agmine incedendo, rursus ea apud Gliniany, versus Leopolim, firmat, opperians, de exerci-

tu Zbaraszenſi notitiā, quā habitā, ſciensq; copias illas ab obſidione jam liberās, iter verſus Gliniany ſuſcepſiſſe Leopolim ingreſſus, ſolennes Deo reddidit gratiarum actiones. Quo paucis poſt diebus tres Duces, quos Rex exercitui poſtmodum ad Zbarasium obſeſſo, pari poteſtate præſecerat, venientes, nimirum Andreas Firlei Palatinus Sendomiriensis, Stanislaus Lanckoronski Caſtellanus Camenecensis, Nicolaus Oſtrorog Pocillator Regni, ſubmiſſè Regi actis gratijs, quod vitæ ſuæ diſcrimine, illis obſidione liberatis, ſalutem dederit, recenſuère, volente Rege, acta totius illius arctiſſimæ obſidionis. Quæ quoniam longum eſſet hîc repetere ſufficiet innuiſſe, decem non amplius millium exercitum, ſeptem hebdomadarum ſpatio, trecentorum millium Coſacorum, centum verò millium Tartarorum obſidionem ſuſtinuiſſe, hoſtem aliquando intra vnam diem duodecies, aliquando quindecies oppugnationem Caſtrorum noſtrorum reſumentem, ſemper ſtrenuè rejeciſſe, Coſacorum & Tartarorum ſupra Sexaginta millia cecidiſſe, ex noſtris duobus tantum Millibus, iisquè majori ex parte, morbis, famequè mortuis, deſideratis. Ad eam enim rerum omnium inopiam, quando ſoluta eſt obſidio redactus fuit Regius exercitus, vt ne ſex quidem dierum intervallo, amplius illam ferre potuiſſet. Quæ omnia cunctorum quidem, quos illa claudebat obſidio, virtute ſteterunt, ſed inter alios Ducis Wiſniewiecy animi fortitudi-
ne, & pugnandi peritiā qui hâc obſidione eximij bellatoris laudem eſt conſecutus. His Rex auditis, poſtea de continendo in futuris hybernis exercitu, cum Ducibus belli egit, rebusq; omnibus perfectis Varſaviam redijt, Regi-
nâ ipſi duorum dierum itinere obviam
prodeunte.







7726
23

